

Beñat Imaz Agirre

E maila • 1 saria

Kaixo! Ni Beñat Imaz naiz. 11 urte dauzkat. Andramendi ikastolako 6. mailan nabil. Oso pozik nago Beasaingo idazlehiaketan saria irabazi dudalako bertsoen E mailan. Nire zaletasunak rugbian jokatzea eta nire lagunekin egotea dira.



URTAROAK ETA TXORIAK

TXANTXANGORRIA, UDABERRIA

Hostoak piztu dira
da udaberria
epeltasuna zaigu
hona etorria
Txio alai batekin
piztu zait irria
kantari baitatorkit
gaur txantxangorria.

UDA. ENARA

Hegan zabiltz batzutan
hona eta hara
txioka han hemendik
heldu da udara
Zerua jolastoki
hartuaz, enara
zure alaitasunaz
gu poztutzen gara.

UDAZKENA. USOA

Bidaiari aparta
zuzen ta txukuna
indartsu ta dotore
hegaz dakizuna
Udazken bidaiari
tinko eta leuna
usoa goza zazu
zuk askatasuna.

NEGUA. AHATEA

Elur malutak mara
Txuri mendatea
Ibaia harro dator
Ur hotzez betea
Hegan eta igeri
Ze elegantea
Herria koloretuz
Dabil ahatea.